

Uunga siunnersuut: Folkehøjskoler pillugit Inatsisartut inatsisaata allangortinnissaa pillugu Inatsisartut inatsisaat nr. xx, xx. xxx 2017-imeersoq

(Ilinniartitaanermut, Kultureqarnermut, Ilisimatusarnermut Ilageeqarnermullu Naalakkersuisoq)

Saqqummiussissut**Siullermeerneqarnera**

Naalakkersuisut sinnerlugit Folkehøjskoler pillugit Inatsisartut inatsisaata allangortinnissaa pillugu Inatsisartut inatsisissaattut siunnersuut matumuuna saqqummiuppara.

Inatsisissatut siunnersuutip suliarinerani erseqqissumik tunggaviuvoq, folkehøjskoler siunissami inissisimanissaat pillugu 2016-imi upernaakkut isumasioqatigiinneq, ilaatigut folkehøjskoler namminneq peqataaffigisaat. Oqallinnermi ilaavoq folkehøjskoler pillugit inatsisip atuuttup allangortinnissaata siunertamut qanoq naapertuutsigineranik naliliineq. Tamanna annermik pissaaq Kalaallit Nunaanni ilinniartuut inissanik atuinerisa annertunerpaatinnissaat siunertaralugu, aamma folkehøjskoler inuiaqatigiinni piginnaasatigut qaffassaaniarluni sulianut, folkehøjskolillu namminneq kissaataat naapertorlugit, annertunerusumik peqataatinnissaat siunertaralugu.

Ilutigisaanik misissoqqissaarneqarpoq, aningaasaqarnikkut pisortaniit tapiisarnermut ilusiliussaq, pingaarnerusutigut siunertat taakku tapersernissaannut maanna atuuttoq, siunertamut naapertuunnersoq. Tamatumunnga ilanngullugu inassutigineqarpoq, inissat atorluarnerunissaat ilutigisaanillu Namminersorlutik Oqartussat aningaasaliissutaasa ingerlanneqartullu pissusissamisuginnartumik imminnut ataqatigiinnissaat qularnaarumallugit, tunggaviusumik tapiissuteqarlunilu ilinniartut naapertorlugit sapaatip-akunneranut taxameteri malillugu tapiisarnerit pilersinnissaat anguniarneqassasoq. Taamaaliornikkut folkehøjskoler amerlanerusunik ilinniartunngortitsisarnissamut kajumissusiat annertusarneqassammat.

Aammattaaq oqallisigineqarpoq, malittarisassat atorneranni allaffissorneq qanoq iliorluni annikillisarneqarsinnaanersoq. Saniatigut inassutigineqarpoq, folkehøjskoler Namminersorlutik Oqartussat akuersinerat nakkutilliinerallu tunuliaqutaralugit, ilinniartut meeqqat atuarfianni inaarutaasumik misilitsinnissaannik isumaginninnissamut akuerineqartassasut. Kiisalu oqaatigineqarpoq, siunertamut naapertuuttuussasoq, taxameteri malillugu aqqissuussinnermut ilaasunut naleqqiullugu, atuisut akiliuteqartarnerisa atorunnaarsinnissaat, taamatullu kommunit ilinniartut akiliutaannut peqataatinneqartarnerat atorunnaarsinneqassasoq. Ilutigisaanik inassutigineqarpoq erseqqissarneqassasoq, folkehøjskoler ingerlatsisut allat isumaqatigisinnarlugit, højskolini ingerlattagaanngitsunik allatigut ilinniartitsinernik neqeroorsinnaassasut. Aammattaaq siunnersuutip nassataraa,

ilinniartitsissutinik assassornermut samminerusunik ingerlatsisinnaanermut periarfissap
erseqqissarneqarnera, soorlu sullivinni ingerlatsinerit ilinniartitsinermi
salliunerutinneqarfigisaannik.

Siunnersuutip aammattaaq folkehøjskolerit suliffeqarfittut imminnut pigisutut inissisimanerat,
tassungalu atasumik akuliuffigineqartannginnissamik tunngavik sunniuteqarfigissanngilaa.

Taamatut oqaaseqarlunga siunnersuut Inatsisartunut inussiarnersumik
suliarisassanngortippara.